

Bosna i Hercegovina
Federacija Bosne i Hercegovine
TUZLANSKI KANTON
KANTONALNI SUD U TUZLI
Broj: 03 0 U 025404 24 U
Tuzla, 06.01.2025. godine

Kantonalni sud u Tuzli, prilikom nejavnog rješavanja, sudija Amira Ferizbegović, uz sudjelovanje zapisničara Nine Stjepanović, u upravnom sporu pokrenutom po tužbi tužitelja: R.A., E.S., Dž.K., A.K. Dž.H., E.K. i S.M., svi vijećnici Općinskog vijeća Kladanj, koje zastupa punomoćnik Amir Mešić, Advokat iz Tuzle, protiv „poziva za održavanje prve konstituirajuće sjednice Općinskog vijeća Kladanj br. 0104-2600/24 od 19.11.2024 godine, zapisnika i odluke/a sa sjednice Općinskog vijeća Kladanj od 21.11.2024 godine, zahtjeva-odluke Općinskog načelnika za održavanjem vanredne sjednice Općinskog vijeća Kladanj broj 02-04-2615/24 od 21.11.2024. godine, zaključka za održavanje vanredne sjednice Općinskog vijeća Kladanj br. 01-04-2615/24 od 22.11.2024 godine, zapisnika i odluke Općinskog vijeća Kladanj sa sjednice od 29.11.2024 godine, rješenja o izboru komisije za izbor, imenovanja i općinska priznanja Općine Kladanj br. 01-04-2631/24 od 22.11.2024. godine, rješenja o izboru predsjedavajućeg OV Kladanj br. 01-04-2632/24 od 22.11.2024. godine, rješenja o izboru zamjenika predsjedavajućeg OV Kladanj br. 01-04-2633/24 od 22.11.2024. godine“ Općine Kladanj-Općinskog vijeća Kladanj, dana 06.01.2025. godine, donio je slijedeće:

R J E Š E N J E

Tužba tužitelja, sa prijedlogom za određivanje privremene mjere osiguranja i prijedlogom za određivanje mjere osiguranja SE ODBACUJU.

O b r a z l o ž e n j e

Protiv akata tuženog bliže opisanih u uvodu rješenja, tužitelji su dana 26.12.2024. godine ovom sudu podnijeli tužbu za pokretanje upravnog spora, sa prijedlogom za određivanje privremene mjere osiguranja i prijedlogom za određivanje mjere osiguranja.

Prilikom prethodnog ispitivanja tužbe i prijedloga za određivanje privremene mjere osiguranja i prijedloga za određivanje mjere osiguranja sud je ocijenio da nisu ispunjeni zakonski uslovi za pokretanje upravnog spora, odnosno da ovakva tužba nije dopuštena u upravnom sporu, kao ni predložene mjere osiguranja.

Naime, odredbama člana 25. stav 1. tačka 2. Zakona o upravnim sporovima ("Službene novine F BiH", broj 9/05) propisano je da će sud rješenjem odbaciti tužbu ako utvrdi da akt koji se tužbom osporava nije upravni akt.

S druge strane, odredbama člana 8. stav 1. Zakona o upravnim sporovima („Službene novine Federacije BiH“ broj 9/05), propisano je da se upravni spor može voditi samo protiv upravnog akta, dok je odredbama stava 2. istog člana propisano, da je upravni akt onaj akt kojim nadležno tijelo rješava o izvjesnom pravu ili obavezi pojedinca ili pravne osobe u nekoj upravnoj stvari.

U konkretnom slučaju, tužitelji predmetnom tužbom pobijaju: poziv za održavanje prve konstituirajuće sjednice Općinskog vijeća Kladanj br. 0104-2600/24 od 19.11.2024 godine, zapisnik i odluke/a sa sjednice Općinskog vijeća Kladanj od 21.11.2024 godine, zahtjev- odluke Općinskog načelnika za održavanjem vanredne sjednice Općinskog vijeća Kladanj broj 02-04-2615/24 od 21.11.2024 godine, zaključak za održavanje vanredne sjednice Općinskog vijeća Kladanj br. 01-04-2615/24 od 22.11.2024 godine, zapisnik i odluku Općinskog vijeća Kladanj sa sjednice od 29.11.2024 godine, rješenje o izboru komisije za izbor, imenovanja i općinska priznanja Općine Kladanj br. 01-04-2631/24 od 22.11.2024. godine, rješenje o izboru predsjedavajućeg OV Kladanj br. 01-04-2632/24 od 22.11.2024. godine, rješenje o izboru zamjenika predsjedavajućeg OV Kladanj br. 01-04-2633/24 od 22.11.2024. godine, zatim uz tužbu je tužitelj predložio i određivanje privremene mjere osiguranja i određivanje mjere osiguranja i to u smislu odredaba Zakona o parničnom postupku.

Iz sadržaja tužbe i pomenutih akata, čije poništenje tužitelj traži vidljivo je da tim aktima nije rješavano o bilo kojim pravima ili obavezama tužitelja u bilo kojoj upravnoj stvari, nego da su tužitelji podnijeli tužbu protiv poziva predsjedavajućeg Općinskog vijeća br. 01-04-2600/24 od 19.11.2024. godine, za prvu konstituirajuću sjednicu Općinskog vijeća, koja je zakazana za dan 21.11.2024. godine i to iz razloga što je poziv za sjednicu dostavljen u kraćem roku nego što Poslovnik o radu Općinskog vijeća Kladanj predviđa, pa se dalje u tužbenim navodima piše o povredama tog Pravilnika i Statuta Općine Kladanj na toj konstituirajućoj sjednici i nastavku te sjednice dana 22.11. 2024. godine i 28.11.2024. godine, gdje na bliže opisani način u tužbi, tužitelji ukazuju kako tuženi kršeći odredbe Poslovnika, svjesno i nezakonito postupaju, iz čega dalje slijedi da gore navedeni akti ne predstavljaju pojedinačan upravni akt, kakav se podrazumijeva po odredbama člana 8. stav 1. Zakona o upravnim sporovima, protiv kojih nije dozvoljeno pokretanje upravnog spora (po shvatanju suda takvi akti mogu se zakonito pobijati, odnosno mijenjati ili dopunjavati samo političkim djelovanjem, u proceduri propisanoj za njihovo usvajanje).

S obzirom na izloženo, na osnovu odredaba člana 25. stav 1. tačka 2. Zakona o upravnim sporovima („Službene novine Federacije BiH“ broj 9/05), valjalo je odlučiti kao u dispozitivu predmetnog rješenja..

Isto tako sud je odbacio i prijedlog tužitelja za određivanje privremene mjere osiguranja i prijedlog za određivanje mjere osiguranja koji su podneseni na temelju odredaba Zakona o parničnom postupku i koje mjere nije dozvoljeno određivati u upravnom sporu.

Z a p i s n i č a r:
Nina Stjepanović, s.r.

S u d i j a:
Amira Ferizbegović, s.r.

POUKA: Protiv ovog rješenja nije dozvoljena žalba.